

浙江文叢

邵晉涵集

〔第八冊〕

浙江出版聯合集團
浙江古籍出版社

浙江文叢

邵晉涵集

〔第八冊〕
南江詩鈔

南江札記

〔清〕邵晉涵 著 李嘉翼 祝鴻杰 點校

浙江出版聯合集團
浙江古籍出版社

圖書在版編目(CIP)數據

邵晉涵集 / (清)邵晉涵撰; 李嘉翼, 祝鴻杰點校.
—杭州: 浙江古籍出版社, 2016. 6
(浙江文叢)
ISBN 978-7-5540-0841-6

I. ①邵… II. ①邵…②李…③祝… III. ①邵晉涵
(1743—1796)—文集 IV. ①Z424.9

中國版本圖書館 CIP 數據核字(2016)第 133257 號

邵晉涵集

(全八冊)

[清]邵晉涵 撰 李嘉翼 祝鴻杰 點校

出版發行 浙江古籍出版社

(杭州市體育場路 347 號 郵編: 310006)

網 址 www.zjguji.com

責任編輯 況正兵

封面設計 劉 欣

責任校對 余 宏

責任印務 樓浩凱

照 排 浙江時代出版服務有限公司

印 刷 浙江新華數碼印務有限公司

開 本 710mm×1000mm 1/16

印 張 150.75

字 數 1544 千字

版 次 2016 年 7 月第 1 版

印 次 2016 年 7 月第 1 次印刷

書 號 ISBN 978-7-5540-0841-6

定 價 750.00 圓(精裝)

如發現印裝質量問題, 影響閱讀, 請與市場營銷部聯繫調換。

ISBN 978-7-5540-0841-6



南江詩鈔卷一

喜晴次周孝廉篴谷震榮韻

霽色開龍岫，憑高坐草亭。雲歸千嶂碧，月上萬松青。鷺羽衝煙澹，鳩啼喚夢醒。何當一甌酒，來問太元經。

六月十三夜周衡齋助瀾先生留飲對月分得明字

蘊隆逼三伏，鬱火雲崢嶸。經閣迴虛敞，薄暮涼風生。我來問奇字，巨鑪叩鏗鐃。解衣任疎放，置酒臨前楹。舉頭天際月，已麗朱簷甍。於時大火中，金餅漫欲盈。微雲絕點綴，皎鏡光太清。直疑積水浮，晃漾秦珠明。參差雜花卉，荇藻紛縱橫。雙柏最奇古，倒映龍蛇縈。屋角露遠山，絕嶂饒孤撐。江城耀金碧，煙靄凝瑤京。拍手叫奇絕，一樽還自傾。虛堂滅華燭，几席增晶瑩。歷歷衆星轉，飄飄絺袂輕。更闌欲分手，瞻顧餘深情。

月夜衡齋先生招沈補山元勳彈琴因留小飲分韻得琴字

對酒陪中散，良宵聽鼓琴。蟹行沙渚遠，雁落楚雲深。皎鏡空庭月，沖和靜者心。曲終輪

影轉，風樹繞清音。

十八日同周蘅齋先生徐藍塍炎丈張羅山廷枚樊中潭耀碧攜酒過曹

秋漁書齋

爲踐登山約，攜樽得得來。納涼銀杏樹，泛酒白蓮杯。山靜碁聲細，江平帆影開。解衣任真率，高興坐莓苔。蒼然暮色起，斜照亂峰開。啜茗風微入，論詩客未回。薄雲巖下合，新月蚌中來。歷歷雙城路，江橋首重迴。

苦雨

經時頻苦雨，秋半復淒淒。雲重千峰失，潮橫兩岸齊。荒階蜻蛚語，深樹鶉鴝啼。日暮南樓外，蒼蒼望眼迷。

病起

病起登高去，秋深萬象清。雨餘千木瘦，潮落半江晴。平野浮霜氣，空山落雁聲。緬懷同調者，何限碧雲情。

旅館有懷

暮風蕭颯動疎林，獨對寒檠思不禁。
旅舍三朝聽雨客，庭闈百里倚門心。
雁沙渺渺留痕淺，雉堞泠泠報漏沈。
明向吳山高處望，越州一片白雲深。

雨後見月漫成

吳山細雨日廉纖，誰復衝泥步廣檐。
蝸角昨朝初對壘，冰蟾今夜忽開圓。
澤濡積蘚猶含潤，風帶清霜已覺嚴。
庭外西湖近咫尺，濛濛煙樹遠山尖。

二十六夜風雨泊舟曹娥江口占

搏風萬里捲雲堆，一葉輕舟滯水隈。
檢點行蹤堪一笑，浙西飛雨帶歸來。
孤篷靜夜擁衾寒，蠻觸紛紛指一彈。
孝女祠邊然燭坐，枯乘風戰葉聲乾。

與楊大以立執禮夜話

今夕爲何夕，三人話夜長。
殘更一卮酒，寒月滿樓霜。
淪落他鄉客，蕭條久客裝。
君今故里去，吳越各參商。

懷金源醴三俊同用州字

朔風挂席渡蛟州，翁浦盤陀攬勝遊。日落梅門鯨浪靜，空青珥赤照雙眸。用吳淵穎詩中語。
春來貳室足淹留，絕島荒城枕碧流。唯有四明長在望，應懷舊雨憶姚州。舟山孤島懸隔海外，惟四明以四百八十丈之高屹立天半，常人望中來。書有云：東望四明，神情俱注。

早春對雪用歐陽體簡周大紫藩宗樞周二起凡宗杰兼懷金三源醴

去年雪瑞表盈尺，郊原冉冉長麥芽。新年天氣忽驟暖，園林馥馥舒梅花。輕裾單袷頗適體，鷓鴣底用稱紛奢。豈知陽亢陰則伏，一寒一暑相交加。穀日鯨鐘欲破曉，阿香拍格喧雷車。清晨懷惻朔風緊，參差雨腳森如麻。瓦溝淅瀝暮飛霰，飄蕭響雪鳴簷牙。連朝翦水斷復續，萬里漠漠同雲遮。整斜疎密各有態，包羅委瑣紛無瑕。光搖燈市彩山眩，聲咽畫鼓漁陽撾。披離修竹拂茅壁，侵陵弱柳敲平沙。三江水寒凝洛澤，四明峯迴迷谿沔。吾聞春雪不到地，巨然留畫空矜誇。孟陬胡爲亦封野，依然明耀臨千家。乃知滕六最變幻，散彩翻使春增華。回溯已冬集經閣，一堂白戰人無譁。石光敲火越二載，茶槍藥裹爲生涯。春來頗覺暢懷抱，況對寒景饒清嘉。揮毫呵凍欲尋約，素心不見徒咨嗟。兩周才力媿軾轍，定盤硬語吟尖叉。經過擬飲葛三酒，招邀欲設陶公茶。兼憶金子客海外，清音直可追瓠巴。幾時乘興來越

水，輕舟棹轉聲軋鴉，東膠咫尺苦泥濘。滄洲更覺程途賒，何不化作雲龍共追逐，相與銜杯對景吞流霞。

海市六十韻

沛澤環山縣，粉榆近水鄉。時平瀾靜謐，望遠海汪洋。百怪森羅列，羣流浩渺長。蜃樓多瑰異，海市越尋常。偶見神應眩，頻看意不忘。奇觀真至幻，寫狀最難詳。輕暖陽春老，瀾漫積霧黃。氣蒸疑酷暑，雲慘掩初暘。元象迷煙靄，波光接潁蒼。鏡平連若木，練淨挂樽桑。負重鼇擎柱，凌虛鼉駕梁。潛蛟騰寶氣，靈蚌吐奇光。田訝麻姑變，天疑壺叟藏。依稀開世界，恍惚闢疆場。紅映鴛鴦瓦，青浮薜荔牆。回環明畫檻，冥洞啟蘭房。簾捲鰕鬚動，簷高雁齒裝。列屏看翡翠，繞砌擁琳琅。泉室珠爲帳，虬宮玉作堂。瓊漿瑪瑙盞，冰簟象牙牀。執旆呼風伯，推車喚阿香。編襪金埒馬，炫耀繡襦裳。朱袖分花翠，鮮裘重鸚鵡。爲誰歸市急，幾處趁墟忙。仙侶風華客，龍姝窈窕娘。珊瑚輝閃閃，火齊影煌煌。水碧時攜弄，明珠遠寄將。馬人時往復，蜃戶與徜徉。泉客鮮明服，鮫綃淺澹妝。升沈看縹渺，瞻顧屬微茫。訝許遊金谷，還疑入錦坊。綺羅勝漢苑，燈火似西涼。雲路三千極，鵬程萬里翔。傳聞多奧衍，雅意望懷襄。憶昔蛟川役，追隨海滌旁。寶山曾眺覽，雉堞喜瞻望。羣岫羅羅髻，平沙漠漠霜。浪高迷略約，風定集餘腥。閩客魚鹽利，紅夷玳瑁相。檣烏分兩背，舟鷁散千行。百道餘霞勢，中天

澹日光。雲濤遙合併，村落忽昭彰。形象看明滅，樓臺任抑揚。恒沙問摩勒，法界想空王。照眼真還幻，披襟喜欲狂。始知天浩蕩，不道語荒唐。遙指排雲出，真思駕葦杭。羈栖一別後，迢遞十年強。偶作句章客，閒遊歷海塘。衛城登埤垠，銀坑上高岡。川后波澎湃，天吳勢蹶猖。石華晴雪散，鐵扇朔風颺。應禱慚蘇叟，雄才愧木張。懷奇空眇眇，念舊獨悵悵。有客談元理，爲余賦遠方。神州騰楫馬，瀛渤駕風檣。躋足凌三島，迴睨覽八荒。暨頭開富麗，閣勢聳堂皇。目覩神蕭爽，心遊氣激昂。凌雲推作手，才思拓絃滄。

題某行看子

琉璃萬頃鏡新磨，涼月初添穆穆波。何似孟家亭子上，澹雲疎雨見銀河。
跨海寧須片席風，乘槎欲問斗牛宮。羣仙幾輩排雲出，玉闕金臺杳渺中。

春郊懷楊大以立

碧雲遮野岸，綠水繞江城。曾與君遊處，今傷我獨行。花殘啼鳥緩，山遠暮雲橫。春色真無賴，憑高不勝情。

夏日湖中雜興

空濛山翠望偏遙，明鏡流中蕩畫橈。一路荷花三十里，晚風吹上定香橋。
蕭蕭襟袖透颼涼，村店青帘是處颼。記得杼山清句好，荷花世界柳絲鄉。

寄懷金三源醴

久作餘杭客，懷人隔海天。旅程淹日月，歸夢各山川。暮雨聞啼鴉，深林聽杜鵑。蹇修空脈脈，微尚若爲宣。

我唱吳中曲，君爲會上吟。都將短長調，引出別離心。鶴怨南雲迴，鸞驚夜月沈。海風吹不斷，飛度甬江潯。

翁浦接胥洲，君今三載遊。夜潮雙峽合，朝日萬峰頭。聞有神仙窟，珠宮白壁樓。星槎應問渡，拂袂挹浮邱。

桂樹山中直，繁英月下飛。應追攜手好，莫惜賞心違。遠岫浮空碧，澄潮澹夕暉。閒庭秋草綠，公子定言歸。

雪霽有懷楊大以立

雪光皎潔照雙城，三徑蕭然廢送迎。殘臘深宵金餅麗，故人新句玉壺清。紅梅映水橫疎影，白雁穿雲響遠聲。占律已知春信近，聽鶯花下擬聯盟。

曉次錢清江

雲木參覃曉景微，錢清江上雨霏霏。低迷麥秀迎風綠，萬頃平疇野雉飛。一葉扁舟破浪花，竹林深處見人家。煙村知是蕭然山名近，綠黛春風過若耶。

固陵旅舍月夜聞笛

一聲江上笛，吹破碧雲陰。明月半輪影，羈人千里心。天高歸雁落，海近臥龍吟。此夕庭闈夢，先期到武林。

固陵曉行

肩輿行曉路，人望固陵寬。吳越雄圖盡，方王舊壘殘。山深留臘雪，江遠激風湍。沽酒青帘近，三杯解宿寒。

寄家書

鄉樹重江外，春來影尚寒。病餘思作健，客裏勉加餐。山湧層雲白，湖涵曉日丹。殷勤藉雙鯉，一爲報平安。

立春日曉晴登吳山十二峰望江

羣山環武林，遠近聳羅髻。紫陽挺危峰，秀擅東南最。三年別越州，目想層雲際。茲來屬孟陬，宿雨崇朝霽。閭闔迴春陽，澤國消陰翳。駕言蠟雙屐，古路雲根細。岡草披和風，帶露沾衣袂。遙見石丈人，昂首迎路次。爲憐太瘦生，顧影頗相類。風磴羊腸紆，林梅羅袖媚。絕頂擬攀躋，惆悵重門閉。瞻此十二峰，掃莓聊小憩。直視海天空，風檣浮芥蒂。一綫轉層瀾，瀉向天河外。陰陽走兩丸，中央互涵蔽。聲奪岳陽潮，氣吞雲夢勢。仿佛神女來，煙霞擁珠翠。我本嶽崎人，夙負向禽志。椒蘭佩徒紉，芰荷衣未製。眷此吾州山，一縱千里睇。仙閣飛來峰，請俟避暑至。

燭花次徐丈藍塍韻

爲問燈含蕊，何如燭耀花。玉蟲輝獸錦，金粟透蟬紗。裳醒宸妃榻，蓮迴學士家。盤疑生

火樹，莖訝綻銀花。不夜枝長亞，先春瓣早華。薪傳應藉草，膏染自培芽。案轉琵琶合，筵披芍藥斜。瀛洲傳珥筆，照道五雲車。

上元月夜有感

新月今宵滿，山窗只獨看。波光兩湖合，樹影六橋寒。樓迴金輪近，城寬火樹攢。鄉風憶說餅，把酒話團圓。

客舍喜張二淳初義年見過

羈愁無次第，鄉思繫蘭陔。山外春陰薄，佳人日暮來。書傳雙玉鯉，春贈一枝梅。時得家書及周二淡人近作。斟酌尊前喜，燈花昨夜開。

吳岫盤空翠，相期伴索居。江湖隨地闊，星月照簷虛。竹屋容高臥，松窗宜讀書。破愁懷夙好，風雨轉憐渠。謂淡人暨金三源體。

吳山小徑梅花盛開用張淳初韻

古路獨行客，相逢縞袂仙。香清半湖水，影瘦夕陽天。標格邀誰賞，芳魂默自憐。春風偏護惜，不乞上聲買花錢。

吳山道院雨中望西湖用王阮亭望湖中法華漁洋諸山韻

我昔居西湖，身入畫圖裏。茲來客吳山，直視空青水。春雨暮霏霏，錯落疎梅蕊。杳靄空濛間，煙光淡城市。淦淦青絲縑，戎戎白蹄豕。幻態何迷離，中有元虛理。濃霧忽橫空，水墨屏風比。亂峰去若迴，溼雲行復止。一氣化三山，吞吐相終始。生平經行處，到眼翻疑似。始知明聖湖，雨景更奇詭。山水含清輝，因風落畫几。寧須嶽雨霑，收拾青鞵底。嘯傲凌滄洲，君言且休矣。

武林織機坊有梅百餘株花時觀者相屬予惜其混迹塵埃殊失冷蕊疎枝之性詩以嘲之

武林城南春事早，亂插梅花向晴昊。新妝豔態搖春風，織機坊裏香雲繞。沈沈院落帶疎煙，研光白紵相新鮮。縞衣夢覺羅浮遠，芳信飄零落人海。貞心應化杜鵑啼，羞向東風開蓓蕾。君不見百物浮沈無定時，朱門蓬戶互遷移。寒香苦憶吳山好，竹外斜陽見一枝。

無題八首

家近長干十二橋，娉婷不嫁度芳朝。畫奩此日餘金粉，繡戶當年買翠翹。太守昨迴青雀

舫，參軍曾挽紫雲髻。相逢恐少同心客，東郭西溝見兩樵。

五角迢迢映六張，蹇修欲度水雲長。香痕幾見窺韓掾，花片何曾逗阮郎。誰種白榆留客住，空調金綫爲人忙。翠簾日暮愁相望，不解逢時豔冶妝。

羅襪香蹊蹴軟塵，相看誰是比肩人。只憐瘦骨支清夜，爲惜濃花病早春。新水寄將函畔淚，遠山愁似鏡中顰。如何洞口芳菲在，不見仙航再問津。

好事何期與願違，芳年待字重因依。諸姑對鏡裁文褓，小妹當窗理嫁衣。谷口羊歸雲漠漠，門前棗煖日輝輝。香牀好倚無心倚，怕見鴛鴦枕畔飛。

半年耽病謝胭脂，爲見春光感歲時。欲采碧桃匀粉面，擬攀金柳比腰肢。草閒撲蝶無人見，陌上分襟有夢知。不那雲廊逢阿母，嗔兒懶慢笑兒癡。

金波穆穆透窗紗，誰識殘妝簇晚霞。未免有情占鵲喜，可憐無語數燈花。魚盤繡闥含金屑，蘭煖雲房透玉芽。翠鳥縱啼秦吉了，芳期猶待七香車。

春雨春風惹恨多，妝臺猶自畫雙蛾。南樓枉用薰蘭麝，東里何心競綺羅。自有知音房仲律，豈無悔過竇連波。懊儂翻作河洲曲，留與心歡比枕歌。

瘦影寒姿默自憐，底須獻笑市門前。馬頭雲遠胡曼合，蠶尾春深綵纈懸。無可如何花拂雨，誰能堪此月當筵。鵲橋猶喜秋期近，好共星郎度漢躔。

題風竹圖

翛然素壁橫修影，誰寫簷簷三兩株。憶向四明溪畔見，風枝雨葉囀山鴉。

出清波門泛湖過第四橋迴眺

春雨點湖波，潏豔澄如鏡。四山新翠流，羃歷朝煙淨。步履出清波，行春試游泳。小舟如缺瓜，畫槳波心競。嫋嫋柳含稊，淦淦蒲生迸。空濛萋萋間，彫檣屬高凭。新沐出層巖，澹洗朝妝靚。碧玉納青蘿，跌蕩中流併。雲移第四橋，龍偃沙隄橫。爲憐勝景移，不覺川程復。到岸更回眸，欲去情猶凝。山水含清暉，雲日相輝映。三歎謝公言，何人繼高咏。

沿山徑至寶掌橋小憩

舍舟陟廣途，逍遙展予步。娉婷西子湖，凝妝待回顧。遙山出晴雲，霏霏如擘絮。千重修竹林，一徑蒼松樹。茅舍帶疎煙，崇岡引輕素。蹊曲架危橋，渺渺行人度。寶公迹已遐，緇流緬非故。想見密林間，野鶴雲中驚。大道湧金碧，亭臺難具數。愛此谿澗聲，八解清流注。恍入四明山，蠟屐披雲霧。何處移白龍，青天飛瀑布。曰余羈疎瓠，懷鄉積悃慮。一水抱雙城，頗協滄洲趣。對景憶家園，撫檻重容與。僕夫遠有期，相招即前路。

遂由見心亭至上天竺有懷蘇文忠公

白雲峰頂迴，乳竇泉聲續。孤亭出中道，清景供遙矚。旃檀被體香，嵐翠霑衣綠。踏閣復攀林，言造三天竺。法宇結層陰，雲嵐逗嘉木。松檜何蕭蕭，依稀露蒼筍。曾聞白衣仙，選夢來深谷。如何楊枝雨，變作扶桑旭。物理任推遷，玄機有盈縮。我思蘇長公，曾就繩牀宿。神光出寶髻，山臺留往復。當年雪霽時，過溪飛屑玉。至今宿雨晴，望古懷芳躅。千載空相思，騁望傷春日。

轉之靈隱飛來峰坐山亭觀冷泉放水處

飛鷲落空中，吐爲青菡萏。錯落散華趺，亘地青螺點。想從風雨移，或被蛟龍撼。我向天竺來，山路雲衣斂。欲入青林巖，徑曲光疑闇。古洞森幽祕，穿漏紅霞澱。妙相具莊嚴，慧理留深鑿。巧匠琢山骨，經營頗慘澹。好事移真伽，轉使嘉名掩。飛來峰石佛爲六朝僧慧理所鑿，見《咸淳臨安志》。後人誤爲楊璉真伽開鑿，多毀去石佛面目。田叔禾有誅髡文，方棠陵有翻案事，皆誤也。緣磴入靈橋，冷泉入清覽。皎鏡無纖塵，風迴白玉簾。寧須苻藻浮，映月生碧毯。前期憶向禽，凌虛發遐感。相逢恨苦遲，欲去情猶歉。有如好饞人，當餐多顧領。他年擬結茅，瀟灑脫名檢。